

von Wulf Wager

## Mudderwitz oder Vaddrwitz



Wieso heißt des eigentlich Mudderwitz? Send Mütter bsonders witzig oder bsonders luschtig? Wikipedia woiß Antwort, wie emmer: "Der Mutterwitz ist eine stetig vorhandene Fähigkeit Sachverhalte schnell zu begreifen, zu beurteilen und auf solche zu reagieren." Interessant fend i, dass sowohl Frau, als au Männer Mutterwitz han kennat, wobei Frau aber komischerweis koin Vaddrwitz han kennat. Witzig, gell?

Wenn Männer ondr sich send, machat se scho mol Witz' uf Koschta vom schwacha Geschlecht. Aber bei de Frau isch des au net andersch. Neulich han i en Stammtisch voll Frau belauscht. Frau lachat jo ibr ganz andere Sacha als Männer. Meine Herra, do send Sprüch ond Witz gfalla, die i niemols dohanna schreiba dät. A paar von de a'ständigere Witz' geb i mol weiter:  
Zom Beischbiel: Er hot gsagt: "Schatz, i mach di zur glückschta Frau von dr ganza Welt!"  
Dodruf sie: "Ich werd di vermissa."  
An anderer Frauawitz, wo i do ghort han:  
Sagt die Frau noch dr Hochzeitsnacht zu ihr'm Mann:  
"Koch scho mol Kaffee - oder kannsch des au net?"  
Am schlemmschta fand i aber mei Nachbere, Sie wissat jo, de propere 150-Kilo-Prachtsweib, , die au bei dem Stammtisch drbei war. Sie hot mi genau gsäah ond trotzdem folgenden Spruch dau: " Wie nennt ma an guataussehenda, intelligenta und sensibla Mann? A Gerücht!  
Na dann ...

Bis näggschdmol      Ihr

Alle Kolumna zom nochlesan  
ondr: [www.woascht.de](http://www.woascht.de)  
oder em Facebook em  
Wulf Wager Fanclub.

